

Tangani bencana secara kolektif

Kehancuran akibat manusia, alam tinggalkan kesan buruk terhadap masyarakat



DR SHAHARUDIN IDRUS

Dunia dan negara sedang berdepan saat sukar dalam menghadapi pelbagai bentuk bencana, sama ada bersifat semula jadi atau bencana alam misalnya banjir besar, kemarau panjang, tanah runtuh, puting beliung, tsunami dan jerebu maupun bencana ciptaan manusia menerusi teknologi seperti penggunaan bom nuklear, perang saudara dan seumpamanya.

Bencana alam yang melanda menyebabkan di satu kawasan mengalami suhu panas melampau sementara di bahagian yang lain pula mengalami banjir besar serta suhu sejuk jauh di bawah tahap beku. Begitu juga dengan bencana ciptaan manusia yang membabitkan perang saudara, perang antara negara kerana berburu sumber petroleum umpamanya membabitkan korban yang cukup ramai di kalangan orang awam, wanita dan kanak-kanak.

Kesemua bencana itu meninggalkan pelbagai kesan buruk yang bukan kepalang kepada masyarakat, flora dan fauna yang lain. Sesetengahnya mengakibatkan kesan ekonomi, alam sekitar dan sosial berpanjangan terhadap sesebuah negara.

Kini Malaysia berdepan situasi suhu panas 36 darjah Celsius di sesetengah kawasan dan dijangkakan boleh meningkat sehingga melebihi 40 darjah Celsius, disebabkan fenomena El Nino sehingga menimbulkan keserasian di kalangan penduduk. Kesan berpanjangan ialah terhadap sumber bekalan air yang semakin berkurangan jika hujan tidak turun dalam tempoh panjang serta mengurangkan jumlah produktiviti pertanian negara.

Kesemua ini mempunyai kesan rantaian dan gandaan yang mengakibatkan tahap kesihatan dan kesejahteraan rakyat kian menurun.

Pada masa sama kita juga digegarkan dengan pelbagai tindakan tidak bertanggungjawab di luar daripada norma dan batas kemanusiaan - membunuh sesama manusia menggunakan bahan teknologi letupan, senjata api dan seumpamanya.

Penduduk trauma

Kejadian yang berlaku di Paris, Istanbul, Jakarta dan Burkina Faso dikaitkan dengan tindakan tidak berperikemanusiaan oleh militan Islamic State (IS) telah mendatangkan kesan ketakutan dan trauma kepada penduduk yang merasakan bahawa tidak ada lagi tempat selamat untuk didiami di muka bumi ini.

Kejadian seumpama ini dilihat boleh berlaku di mana sahaja yang menyebabkan kehancuran ekonomi, sosial dan budaya. Perkara ini sebenarnya adalah rentetan serangan 11 September yang berlaku di Amerika Syarikat 15 tahun lalu. Ini bermakna dalam tempoh itu, dunia tidak

dapat lagi lari daripada bencana bikinan manusia ini.

Kita juga berdepan bencana ekonomi yang menyaksikan penurunan harga sumber terpenting tenaga iaitu petroleum yang kini berada di bawah AS\$30 satu tong berbanding AS\$150 sedikit masa dulu. Penurunan yang begitu ketara ini menjadikan sesetengah negara yang bergantung sepenuhnya kepada sumber petroleum untuk pembangunan ekonomi, terseret dalam kancan kemiskinan berterusan jika harganya secara berterusan menurun.

Tambahan pula sekatan penjualan petroleum yang selama ini dikenakan terhadap Iran, sudah berakhir dan negara itu bebas untuk mengeksport petroleum. Berdasarkan jumlah produk yang begitu besar berada di pasaran dunia akan menyebabkan harganya akan terus menjunam. Jika keadaan ini berterusan, ia mampu melumpuhkan sistem ekonomi sesetengah negara yang bergantung sepenuhnya terhadap sumber bumi ini.

Di samping itu, keadaan kesihatan penduduk juga agak tergugat oleh pelbagai jenis penyakit yang merebak sehingga mengancam nyawa manusia. Penyakit seperti demam dengi, kepiatu, malaria hinggalah kepada penyakit bawaan air dan jangkitan seperti leptoporosis atau kencing tikus telah menyebabkan kematian yang ramai.

Virus zika

Terbaru, penyakit disebabkan oleh virus zika yang merebak begitu pantas di beberapa negara terutamanya Amerika Latin begitu membimbangkan kesannya terutama bagi ibu hamil. Sementelahan demam dengi yang disebabkan oleh nyamuk aedes di negara ini pun dilihat sukar untuk dibanteras disebabkan oleh sikap masyarakat yang mengabaikan kebersihan persekitaran, apatah lagi virus lain yang seumpamanya.

Kini, negara juga berdepan situasi politik yang kurang tenteram disebabkan oleh ugutan dan ancaman dari satu pihak terhadap pihak yang lain. Namun diharapkan agar suasana politik ini tidak menggugat dan seterusnya menjadi bencana yang mengancam situasi aman di negara kita ini kerana suasana politik yang kurang tenteram mungkin mengundang bencana sosial yang lebih besar kesan dan akibatnya terhadap keseluruhan masyarakat negara ini nanti.

Apakah sikap kita terhadap segala bencana yang berlaku di sekeliling kita ini? Sesetengah bencana boleh diatasi melalui pelbagai aras, sama ada secara individu, kolektif maupun tindakan oleh pihak berkuasa dan kerjasama dengan seluruh anggota masyarakat.

Kesemua bencana yang saling berkait ini wajar dilihat di dalam satu kerangka besar konsep kemudahtercaman untuk benar-benar memahami setiap perkara yang berlaku dan tindakan yang sewajarnya diambil terhadap setiap bencana itu yang mempunyai pendekatan berbeza-beza untuk menangani.

Penulis

ialah Profesor Madya/Felo Kanan & Ketua Hal-ehwal Jaringan dan Industri (HEJIM) Institut Alam Sekitar dan Pembangunan (LESTARI), UKM

SIDANG REDAKSI

Pengarang Urusan
Kumpulan NSTP
Datuk Abdul Jalil Hamid
jalil@bh.com.my

Pengarang
Kumpulan BH
Datuk Mahfar Ali
mfa@bh.com.my

Timbalan Pengarang
Kumpulan BH
Datuk Badruddin
Othman
baneta@bh.com.my

Pengarang Eksekutif
Pengeluaran Perotakian & Digital
Rosli Sofar
roslis@bh.com.my

Pengarang Eksekutif
Berita/Rencana/Digital
Ahmad Zaini
Kamaruzzaman
madzaini@bh.com.my

BH
diterbitkan oleh The New
Straits Times Press (M) Bhd,
31, Jalan Riong,
59100, Kuala Lumpur,
Tel: 1-300-22-6787
Faks: 03 20567081
Laman Web:
www.bharan.com.my
E-mel:
bhrenanca@bh.com.my